



KOMUNIKADO PA PRENSA

Fecha
25 di yüli 2016

Kolaboradó di Maneho
Corinne Leysner

Email
corinne.leysner@gobiernu.cw

Gobièrnu ta bai repartí number pa kasnan den barionan di Banda Riba.

Willemstad – For di djarason dia 27 di yüli, kolaboradónan di ROP/Kranshi ta pasa den barionan di Banda Riba pa entregá number di kas na habitantenan ku ta biba den kayanan ku na 2014 i 2015 a haña un nòmber di kaya ofisial. Esaki ta un proyekto ku kua Minister Suzy Camelia-Römer, huntu ku ROP, Kranshi i Konseho Supremo Elektoral ta inisia un trayekto pa trata di yega na sinkronisashon di adrèsnan ofisial pa tur kas na Kòrsou.

Tur habitante di Kòrsou mester ta registrá na un adrès ofisial. Esei ta nesesario por ehèmpel pa por risibí karchi pa bai vota, pa por hasi uso di servisionan gubernamental, pa pòst por yega na drechi, pero tambe pa polis, ambulans i brantwer por yega lihé ora ta nesesario. Importante den e trayekto aki ta ku e diferente servisionan di Gobièrnu tambe mester yega na sinkronisashon di adrèsnan. No por ta asina ku un instansha tin registrá pa un kas komo adrès, por ehèmpel "Popo Oost zonder nummer naast kavel 14b", miéntras un otro instansha tin pa mes un kas registrá komo adrès "Kaya Djembe 34".

E kolaboradónan tin identifikashon ofisial di Gobièrnu i un deklarashon ku e habitante tin ku firma komo prueba ku el a risibí e number di kas. Si e habitante no ta na kas, ta laga un karta atras kaminda ta splika kon por tuma kontakto ku e kolaboradó pa un sita nobo. Den e simannan ku ta sigui, tin deliberashon tambe entre e diferente organisashonnan gubernamental i esnan pafó di Gobièrnu, tokante sinkronisashon di adrèsnan. Minister Suzy Camelia-Römer, ROP, Kranshi i Konseho Supremo Elektoral ta pidi koperashon di habitantenan na momento di bishita di un di e kolaboradónan di ROP/Kranshi.